



Headline: Waspada Macau Scam menyamar pegawai LHDN Language: Malay

Publication/Portal: Berita Harian

Date: 8 June 2021

Section: Nasional

Page: 17

# Waspada Macau Scam menyamar pegawai LHDN

556 kes disiasat babit kerugian lebih RM15.26j bagi tempoh 1 Januari sehingga 27 Mei

Oleh Tuty Haryanti  
Ahmad Rodzi  
bhnews@bh.com.my

**Kuala Lumpur:** Lembaga Hasil Dalam Negeri (LHDN) meminta orang ramai supaya sentiasa berwaspada dengan sindiket penipuan macau scam yang giat memperdayakan mangsa.

LHDN dalam satu kenyataan semalam, memaklumkan bagi tempoh 1 Januari sehingga 27 Mei lalu, pihaknya menyiasat sebanyak 556 kes membabitkan kerugian lebih RM15.26 juta berkaitan Macau Scam menyamar sebagai pegawai LHDN.

Katanya, sindiket itu menggunakan modus menerusi panggilan telefon yang memperkenalkan

diri sebagai pegawai LHDN dan menyatakan syarikat atau perniagaan mangsa mempunyai tunggakan cukai yang perlu diselesaikan.

"Mangsa yang terkeliru dengan panggilan ini kebiasaannya membuat penafian dan seterusnya panggilan akan disambungkan kepada individu menyamar sebagai polis, pegawai Bank Negara Malaysia (BNM) atau pegawai penguat kuasa lain dengan memaksa mangsa untuk membuat laporan rasmi.

"Mangsa kemudian dikaitkan pula dengan kegiatan pengubahan wang haram, pengedaran dadah atau kegiatan jenayah lain sehinggakan mereka menjadi panik dan diminta untuk menyerahkan maklumat perbankan termasuk nombor Kod Pengesahan Transaksi (TAC) atau Kata Laluan Guna Sekali (OTP)," katanya.

Menurut kenyataan itu lagi, mangsa hanya menyedari ditipu selepas mendapati wang dalam akaun sudah dipindahkan ke akaun pihak ketiga selain suspek tidak dapat dihubungi.

"LHDN tidak membincangkan hal berkaitan percukaian melalui panggilan telefon peribadi sebaliknya permohonan maklumat dari-



LHDN meminta orang ramai membuat pengesahan terhadap setiap panggilan, e-mel atau surat meragukan elak jadi mangsa penipuan.

(Foto hiasan)

pada pembayar cukai dan arahan pembayaran cukai tertunggak akan dilakukan melalui surat atau e-mel rasmi menggunakan domain @hasil.gov.my.

"Selain itu, pembayar cukai hendaklah memastikan bayaran cukai pendapatan dan cukai keuntungan harta tanah dibuat kepada Ketua Pengarah Hasil Dalam Negeri atau LHDN, manakala bayaran duti setem dibayar kepada pemungut duti setem," katanya.

Justeru, orang ramai dinasi-

atkan supaya lebih berhati-hati dan membuat pengesahan dengan LHDN terlebih dahulu terhadap setiap panggilan, e-mel atau surat meragukan dengan menghubungi talian Hasil Care Line atau pegawai yang boleh disemak senarainya pada portal rasmi [www.hasil.gov.my](http://www.hasil.gov.my) atau hadir ke cawangan berhampiran.

Orang ramai juga boleh membuat semakan modus operandi sindiket penipuan melalui media sosial dan portal rasmi.